

Na osnovu člana 56. Zakona o organizaciji organa uprave u Federaciji Bosne i Hercegovine („Službene novine Federacije BiH“, broj 35/05), Zakona o pečatu Kantona Sarajevo („Službene novine Kantona Sarajevo“, broj 3/09-Prečišćeni tekst) i poglavlja III stav 1. tačka 11. Smjernica za uspostavu i jačanje interne kontrole kod budžetskih korisnika („Službene novine Federacije BiH“, broj 19/05), ministar za boračka pitanja Kantona Sarajevo d o n o s i

P R A V I L N I K O ČUVANJU I UPOTREBI PEČATA MINISTARSTVA ZA BORAČKA PITANJA KANTONA SARAJEVO

I OSNOVNE ODREDBE

Član 1.

Pravilnikom o čuvanju i upotrebi pečata (u daljnjem tekstu: Pravilnik) u Ministarstvu za boračka pitanja Kantona Sarajevo (u daljnjem tekstu: Ministarstvo), uređuju se:

- Oblik i sadržaj pečata,
- Izrada pečata,
- Čuvanje i upotreba pečata,
- Uništavanje i postupak u slučaju nestanka pečata i
- Završne odredbe.

II OBLIK I SADRŽAJ PEČATA

Član 2.

Pečat Ministarstva ima oblik kruga, u prvom koncentričnom krugu sadrži tekst: „Bosna i Hercegovina – Federacija Bosne i Hercegovine“, u drugom koncentričnom krugu tekst „KANTON SARAJEVO“, ispisan velikim slovima špacionirano i u trećem koncentričnom krugu „MINISTARSTVO ZA BORAČKA PITANJA SARAJEVO“, ispisan velikim slovima.

U sredini pečata je grb Kantona.

Član 3.

Pečat Ministarstva ima prečnik od 50 mm (veliki pečat).
Ministarstvo ima i pečat prečnika 30 mm (mali pečat).
Mali pečat ima isti sadržaj kao i pečat iz člana 2. ovog Pravilnika.

Član 4.

Ministarstvo ima jedan (1) pečat prečnika 50 mm i jedan (1) pečat prečnika 30 mm.

III IZRADA PEČATA

Član 5.

Ministarstvo dostavlja pismeni zahtjev za odobravanje izrade pečata Ministarstvu pravde i uprave Kantona.

Na osnovu rješenja Ministarstva pravde i uprave Kantona kojim se odobrava izrada pečata, Ministarstvo pristupa izradi pečata.

Pečate izrađuje pečatoreznica koju je ovlastilo Ministarstvo pravde i uprave Kantona.

Ministarstvo podnosi pismeni zahtjev za izradu pečata ovlaštenoj pečatoreznici.

Uz zahtjev iz stava 4. ovog člana, Ministarstvo je dužno dostaviti i rješenje o odobrenju izrade pečata Ministarstva pravde i uprave Kantona.

Pečatoreznica izrađuje pečat u veličini i sa tekstom koji je naveden u rješenju o odobrenju izrade pečata Ministarstva pravde i uprave Kantona.

Član 6.

Pečati se izrađuju od materijala koji najviše odgovara svrsi upotrebe.

IV ČUVANJE I UPOTREBA PEČATA

Član 7.

Pečatom rukuje i upotrebljava ga ministar Ministarstva.

Ministar može ovlastiti posebnim rješenjem i zaposlenika, namještenika ili državnog službenika Ministarstva, da upotrebljava i rukuje pečatom.

Član 8.

Pečat se stavlja sa lijeve strane potpisa ministra ili zaposlenika kojeg je ministar ovlastio posebnim rješenjem za potpisivanje službenih akata Ministarstva, ako zakonom ili drugim propisom nije drugačije određeno.

Član 9.

Pečati se moraju čuvati i upotrebljavati tako da se onemogući njihova zloupotreba.

Zaposlenik ovlašten posebnim rješenjem da upotrebljava i rukuje pečatom dužan je da u toku radnog vremena organizuje vršenje poslova i zadataka tako da pečati budu stalno pod njegovim nadzorom i da ne smiju doći u posjed neovlaštenih osoba.

Po završetku radnog vremena pečati se moraju čuvati zaključani u kasi Ministarstva, u zaključanoj radnoj prostoriji Ministarstva u kojoj je osigurana njihova sigurnost.

Član 10.

U slučaju da se pečati upotrijebe na službene akte koja nije potpisao ministar Ministarstva ili ovlašteni rukovodeći državni službenik, čini se teška povreda službene dužnosti, za čiju se povredu izriče disciplinska kazna.

V UNIŠTAVANJE I POSTUPAK U SLUČAJU NESTANKA PEČATA

Član 11.

Pečati Ministarstva koji su zbog istrošenosti ili drugih razloga postali neupotrebljivi moraju se odmah uništiti.

Pečat se smatra neupotrebljivim zbog istrošenosti ako se iz njegovog otiska jasno ne vidi tekst koji daje otisak pečata Ministarstva.

O uništavanju pečata stara se ministar Ministarstva ili zaposlenik ovlašten posebnim rješenjem da upotrebljava i rukuje pečatima.

Član 12.

Na pismeni zahtjev Ministarstva, koji treba da sadrži broj primjeraka pečata, njihove otiske i razloge zbog kojih se pečati dostavljaju na uništenje, uništavanje pečata vrši Ministarstvo pravde i uprave Kantona, kome se dostavljaju pečati Ministarstva koji se trebaju uništiti.

Član 13.

U slučaju nestanka pečata Ministarstva, ministar Ministarstva ili zaposlenik ovlašten za čuvanje i upotrebu pečata, dužan je odmah prijaviti nestanak pečata Ministarstvu unutrašnjih poslova Kantona i oglasiti u „Službenim novinama Kantona Sarajevo“.

Nestali pečat smatra se nevažećim od dana oglašavanja u „Službenim novinama Kantona Sarajevo“, a u slučaju kasnijeg pronalaženja nevažeći pečat će se uništiti.

Novi pečat koji se izrađuje umjesto nestalog pečata mora biti posebno označen.

VI ZAVRŠNE ODREDBE

Član 14.

Izmjene i dopune ovog Pravilnika vrše se na način i po postupku za njegovo donošenje.

Član 15.

Ovaj Pravilnik stupa na snagu narednog dana od dana donošenja.

Broj: 06-02-6705/10

Sarajevo, 31.03.2010. godine



MINISTAR

Mirza Ibrahimović